



Broj: 01-03-26-006-12-II/06
Sarajevo, 22.09.2006. godine

Na osnovu člana 25. stav (1) pod e), člana 42. pod d) u vezi sa čl. 12., 14., 16. i 18., te u skladu sa članom 24. stav (2) Zakona o konkurenciji ("Službeni glasnik BiH", broj 48/05), po Prijavi namjere koncentracije između Privredne banke Zagreb d.d., sa sjedištem u Zagrebu, Račkoga 6, Republika Hrvatska i LT Gospodarske banke d.d. sa sjedištem u Sarajevu ul. Ferhadija 11, Bosna i Hercegovina, zaprimljena pod broj 01-26-006-II/06 od 02.06.2006. godine, Konkurencijsko vijeće, na 33. (tridesettrećoj) sjednici održanoj dana 22. septembar 2006. godine, je donijelo

R J E Š E N J E

1. Ocjenjuje se dopuštenom koncentracija koja će nastati na tržištu bankarskih i finansijskih usluga stjecanjem većinskog učešća u LT Gospodarskoj banci d.d Sarajevo ul. Ferhadija 11, Bosna i Hercegovina od strane Privredne banke Zagreb d.d. sa sjedištem u Zagrebu, Račkoga 6, Republika Hrvatska.
2. Koncentracija iz tačke 1. ovog Rješenja upisuje se u Registar koncentracija.
3. Zbog nepodnošenja Prijave namjere koncentracije u zakonom predviđenom roku, izriče se novčana kazna Privrednoj banci Zagreb d.d. u visini od (..)**¹ od ukupnog godišnjeg prihoda po završnom računu u 2005. godini, kao godini koja je prethodila koncentraciji, što odgovara iznosu od 75.000,00 KM koji je Privredna banka Zagreb d.d. dužna platiti u roku od 8 (osam) dana, od dana dostavljanja ovog Rješenja.
4. Ovo Rješenje je konačno i bit će objavljeno u "Službenom glasniku BiH" i službenim glasilima entiteta i Brčko Distrikta Bosne i Hercegovine.

O b r a z l o ž e n j e

Privredna banka Zagreb d.d. sa sjedištem u Zagrebu, Račkoga 6, Republika Hrvatska (u daljem tekstu: podnosilac Prijave ili PBZ) je podnijela Konkurencijskom vijeću Prijavu namjere koncentracije kojom PBZ namjerava kupovinom dionica LT Gospodarske banke d.d. Sarajevo ul. Ferhadija 11, Bosna i Hercegovina (u daljem tekstu: LTG banka) postati njen većinski vlasnik.

Prijava namjere koncentracije je proizašla kao obaveza na osnovu člana 14. stav (1) tačka a) Zakona o konkurenciji (u daljem tekstu: Zakon) jer je ukupni godišnji prihod učesnika koncentracije ostvaren prihodom od bankarskih usluga na svjetskom tržištu iznosio preko 100.000.000,00 KM po završnom računu u godini koja je prethodila koncentraciji. Podnosilac Prijave ima obavezu da prijavi koncentraciju Konkurencijskom vijeću jer su učesnici koncentracije ostvarili sljedeći konsolidovan prihod na dan 31.12.2005. godine:

Tabela 1.

Konsolidovani prihod (KM)	PBZ	LTG banka
Svijet	(..)**	-
Bosna i Hercegovina	-	(..)**

¹ Podaci u cijelom tekstu Rješenja sa oznakom (..)** predstavljaju poslovnu tajnu.

Prijava namjere koncentracije podnesena Konkurencijskom vijeću, dana 02.06.2006. godine, nije bila kompletna, u smislu člana 31. Zakona, i podnosilac Prijave je istu dopunio dana 28.07.2006. godine, dana 11.08.2006. godine i dana 17.08.2006. godine.

Konkurencijsko vijeće, dana 11.09.2006. godine, je dostavilo podnosiocu Prijave Potvrdu o prijemu kompletne i uredne Prijave broj 01-03-26-006-10-II/06, u skladu sa članom 30. stav (1) tačke a) i b) Zakona.

U postupku ocjene Prijave namjere koncentracije utvrđene su sljedeće činjenice:

Pravni osnov koncentracije

Pravni osnov za Prijavu namjere koncentracije je sticanje većinskog dijela dionica putem Okvirnih ugovora o prodaji dionica između četiri prodavca, većinskih dioničara LTG banke i PBZ, i to:

- 1) Okvirni ugovor o prodaji (..)** dionica LTG banke što predstavlja (..)**% od ukupnog broja običnih dionica LTG banke sklopljen dana 09.02.2006. godine, sa prodavcem privrednim društvom Matković d.o.o. MBS 4281003370007, sa sjedištem u Livnu, ul. Splitska bb, Bosna i Hercegovina.
- 2) Okvirni ugovor o prodaji (..)** dionica što predstavlja (..)**% od ukupnog broja običnih dionica LTG banke sklopljen dana 29.03.2006. godine, sa prodavcem Hrvatskom zajednicom Herceg–Bosna sa sjedištem u Mostaru, Kneza Domagoja bb, Bosna i Hercegovina, udruženje građana, upisano u Registar udruženja građana kod Federalnog ministarstva pravde, Sarajevo.
- 3) Okvirni ugovor o prodaji (..)** dionica što predstavlja (..)**% od ukupnog broja običnih dionica LTG banke sklopljen dana 29.03.2006. godine, sa prodavcem Franjevačkim provincijalatom Bosne Srebrene sa sjedištem u Sarajevu, M. Busuladžića 6, Bosna i Hercegovina.
- 4) Okvirni ugovor o prodaji (..)**dionica LTG banke što predstavlja (..)**% od ukupnog broja običnih dionica LTG banke sklopljen dana 04.04.2006. godine, sa g-dinom (..)**.

Ukupan broj dionica koje PBZ namjerava steći kupovinom od navedenih Prodavaca predstavlja (..)**% ukupnog broja običnih dionica LTG banke sa pravom glasa.

Učesnici koncentracije i njihova relevantna obilježja

Učesnici koncentracije su Privredna banka Zagreb d.d., Račkoga 6, Republika Hrvatska i LT Gospodarska banka d.d. Sarajevo ul. Ferhadija 11, Bosna i Hercegovina.

Privredna banka Zagreb d.d. Zagreb, MBS 080002817 registrovana je kod Trgovačkog suda u Zagrebu. Podređena je i kontrolisana od strane Intesa Holding International S.A. Luxemburg, 19-21 Boulevard du Prince Henri, koji je vlasnik (..)** % njenog osnovnog kapitala.

Intesa Holding International S.A., Luxemburg je supsidijarno društvo Banca Intesa S.p.A. Banca Intesa S.p.A je najveća banka u Italiji te jedna od najvećih banaka u Europi s ukupnom aktivom od (..)**KM (..)**EUR, na dan 31.12.2005. godine.

Osnovni kapital PBZ iznosi (..)** KM (..)** EUR i predstavlja jednu od najvećih banaka u Republici Hrvatskoj. Ukupna aktiva PBZ na dan 31.12.2005. godine iznosi (..)** KM (..)** EUR.

PBZ nije direktno vlasnik dionica niti jednog privrednog društva u Bosni i Hercegovini, ali indirektno putem privrednog društva PBZ CARD d.o.o. Zagreb, društva u (...)***% vlasništvu PBZ, vlasnik je (...)***% udjela u društvu Centurion finansijske usluge d.o.o. Sarajevo. Osnovna djelatnost privrednog subjekta Centurion finansijske usluge d.o.o. Sarajevo (registrovanog 19.08.2005. godine-Rješenje broj UF/I-1251/05) je posredovanje između trgovaca (ponuđača proizvoda i usluga s kojim imaju sklopljen ugovor o prihvatu American Express kartica) i korisnika American Express kartica. Prema podacima iz Prijave učestvovanje American Express kartica je neznatno i iznosi oko 0,1 od ukupnog broja izdatih kartica u Bosni i Hercegovini.

U predmetnoj Prijavi je navedeno da je Intesa Holding International S.A., Luxemburg većinski vlasnik UPI banke dd Sarajevo, Obala Kulina Bana 9a (Rješenje Općinskog suda u Sarajevu broj UF/I-1487/05) sa vlasničkim udjelom (...)***% (Konkurencijsko vijeće je pokrenulo Postupak po službenoj dužnosti ocjene dopuštenosti koncentracije Intesa Holding International S.A i UPI banke d.d. Sarajevo, dana 21. juni 2006. godine).

LTG banka, sa sjedištem u Sarajevu, ul. Ferhadija 11, je registrovana kod Kantonalnog suda u Sarajevu u 2003. godine (sudskog registra broj 1-24039) spajanjem Gospodarske banke Sarajevo i LT Komercijalne banke Livno. LTG banka registrovana je za obavljanje bankarskih poslova i orjentisana je na poslovanje u segmentu univerzalnog bankarstva.

Osnovni kapital LTG banke iznosi (...)***KM. Ukupana tržišna učešća LTG banke, na dan 31.12.2005. godine, u ukupnoj bankarskoj aktivni Bosne i Hercegovine su:

Tabela 2.

	(000 KM)			Tržišno učešće LTG banke u ukupnoj bankarskoj aktivni (%)	
	BiH	FBiH	LTG banka	BiH	FBiH
Ukupni krediti	7.546.000,00	5.545.100,00	88.100,00	1,17	1,59
Ukupni depoziti	8.788.000,00	6.864.100,00	108.200,00	1,23	1,57
Ukupna aktiva	16.334.000,00	12.409.100,00	196.300,00	1,20	1,58

Bankarske usluge za stanovništvo (maloprodajno bankarstvo) obuhvaćaju depozite i račune (tekući računi, štedni računi, novčani depoziti i čekovi itd), usluge novčanih transakcija, izdavanje platežnih kartica, transfer kredita, direktna zaduženja, krediti (za fizičke osobe, potrošački krediti, hipotekarni krediti i sl.), zajednički fondovi, mirovinski fondovi itd.

Struktura tržišnog učešća LTG banke na tržištu maloprodajnog bankarstvo, na dan 31.12.2005. godini, u Bosni i Hercegovini iznosi:

Tabela 3.

	(000 KM)			Tržišno učešće LTG banke u ukupnoj strukturi maloprodajnog bankarstva (%)	
	BiH	FBiH	LTG banka	BiH	FBiH
Ukupni krediti	3.442.000,00	2.784.053,00	47.768,00	1,39	1,72
Ukupni depoziti	3.252.000,00	2.717.081,00	65.630,00	2,02	2,41

Korporativno bankarstvo obuhvaća širok djelokrug bankarskih usluga koje se generalno nude klijentima. U ovu skupinu usluga se uključuju depoziti, krediti, novčane transakcije, kreditna pisma, međunarodne isplate itd.

Struktura tržišnog učešća LTG banke na tržištu korporativnog bankarstva, na dan 31.12.2005. godine, u Bosni i Hercegovini iznosi:

Tabela 4.

	(000 KM)			Tržišno učešće LTG banke u ukupnoj strukturi korporativnog bankarstva (%)	
	BiH	FBiH	LTG banka	BiH	FBiH
Ukupni krediti	4.104.000,00	2.761.024,00	40.325,00	0,98	1.46
Ukupni depoziti	5.536.000,00	4.146.967,00	42.548,00	0,77	1.03

U analizi relevantnog tržišta Konkurencijsko vijeće ocjenjuje dopuštenost predmetne koncentracije utvrđujući strukturu relevantnog tržišta i tržišno učešće učesnika koncentracije na relevantnom tržištu.

Relevantno tržište čini tržište određenih proizvoda ili usluga koje su predmet obavljanja djelatnosti podnosioca Prijave na određenom geografskom tržištu.

Relevantno tržište usluga u konkretnom slučaju je tržište univerzalnog bankarstva što podrazumijeva pružanje bankarskih usluga maloprodajnog i korporacijskog bankarstva na cijelom teritoriju Bosne i Hercegovine.

Budući da učesnici predmetne koncentracije djeluju na cijelom teritoriju Bosne i Hercegovine, relevantno tržište u geografskom smislu smatrat će se cijeli teritorij Bosne i Hercegovine (Tabela broj 5).

Slijedom navedenog, pod relevantnim tržištem u predmetnoj koncentraciji podrazumijeva se pružanje usluga u segmentu univerzalnog bankarstva na cijelom teritoriju Bosne i Hercegovine.

U analizi relevantnog tržišta učesnika predmetne koncentracije, odnosno, u analizama i procjenama tržišnih učešća, korišteni su podaci Agencije za bankarstvo FBiH i RS, kao i podaci iz Prijave namjere koncentracije.

Poslovna mreža LTG banke, na dan 31.12.2005. godine, u Bosni i Hercegovini je:

Tabela 5.

Poslovna mreža	Tržišta		LTG banka		Tržišno učešće LTG banke (%)	
	BiH	FBiH	FBiH	RS	BiH	FBiH
Broj filijala i poslovnica	850	490	25	1	3,06	5,10

LTG banka ne obavlja poslove leasing-a tako da u tim poslovnim djelatnostima nema učešća na tržištu Bosne i Hercegovine.

UPI banka je povezana s učesnicima koncentracije preko Intesa Holding International S.A., Luxemburg odnosno Banca Intesa S.p.A. i radi toga u analizama strukture tržišnog učešća na relevantnom tržištu univerzalnog bankarstva u Bosni i Hercegovini u 2005. godini je uračunato i tržišno učešće UPI banke.

Tržišno učešće UPI banke, na dan 31.12.2005. godine, u Bosni i Hercegovini su:

Tabela 6.

	(mil. KM)			Tržišno učešće UPI banke u ukupnoj bankarskoj aktivi (%)	
	BiH	FBiH	UPI banka	BiH	FBiH
Ukupni krediti	7.546,4	6.032,4	213,2	2,83	3,53
Ukupni depoziti	6.894,5	5.581,5	353,8	5,13	6,34
Ukupna aktiva	11.878,6	9.645,6	439,8	3,70	4,56

Zajedničko tržišno učešće Grupe Intesa u bankarskoj aktivni Bosne i Hercegovine nakon koncentracije iznosilo bi 4,87% (LTG Banka 1,17% i UPI Banka 3,70%), a u FBiH 6,15% (LTG Banka 1,59% i UPI Banka 4,56%).

Procjena koncentracije

Procjenjujući i analizirajući sve utvrđene podatke i činjenice u postupku donošenja predmetnog Rješenja, kako pojedinačno tako i korelativno, Konkurencijsko vijeće je utvrdilo da namjeravanom koncentracijom predmetnih privrednih subjekata neće doći do sprječavanja, ograničavanja ili narušavanja tržišne konkurencije na relevantnom tržištu, već će ista dovesti do pojačane tržišne konkurencije u oblasti pružanja bankarskih usluga u Bosni i Hercegovini. Radi toga je Konkurencijsko vijeće ocijenilo predmetnu koncentraciju dopuštenom u smislu člana 18. stav (2) Zakona, i odlučilo kao u dispozitivu ovog Rješenja.

Slijedom navedenog, pri donošenju ove odluke Konkurencijsko vijeće je posebno imalo u vidu da se namjeravanom koncentracijom značajno ne povećava postojeće tržišno učešće učesnika koncentracije na relevantnom tržištu bankarskih usluga (prikazano u Tabelama 2., 3. i 4.), te u skladu s tim se ne stvara vladajući položaj koji bi za posljedicu mogao imati značajno narušavanje tržišne konkurencije u Bosni i Hercegovini u smislu Zakona o konkurenciji.

Novčana kazna

Konkurencijsko vijeće podnosiocu Prijave je izreklo novčanu kaznu kao u dispozitivu Rješenja u skladu sa članom 49. stav (1) tačka b) Zakona, a u vezi sa članom 16. stav (1) Zakona.

Naime, podnosioc Prijave je sklopio četiri okvirna ugovora sa vlasnicima dionica LTG banke: Okvirni ugovor o prodaji (..)** dionica LTG banke (..)**% od ukupnog broja običnih dionica LTG banke dana 09.02.2006. godine, Okvirni ugovor o prodaji (..)** dionica (..)**% dana 29.03.2006. godine, Okvirni ugovor o prodaji (..)** dionica (..)**% dana 29.03.2006. godine i Okvirni ugovor o prodaji (..)** dionica LTG banke (..)**% dana 04.04.2006. godine.

Podnosioc prijave sklapanjem prvog Okvirnog ugovora (dana 09.02.2006. godine) je stekao preko (..)**% ukupnog broja dionica LTG banke, u smislu člana 12. stav (1) Zakona, i u skladu sa odredbom člana 16. (1) Zakona o konkurenciji je bio obvezan da u roku od osam dana od dana sklapanja tog Okvirnog ugovora podnese prijavu namjere koncentracije Konkurencijskom vijeću, što je isti propustio da učini. Nakon toga podnosioc Prijave je sklopio još tri Okvirna ugovora o kupovini dionica LTG Banke zaključno s danom 04.04.2006. godine, a prijavu namjere koncentracije je Konkurencijskom vijeću dostavio dana 02.06.2006. godine.

Odredbom člana 49. stav (1) tačka b) Zakona, Konkurencijsko vijeće privrednom subjektu može izreći novčanu kaznu koja ne prelazi 1% ukupnog prihoda u predhodnoj godini ako ne podnese prijavu namjere koncentracije, u smislu člana 16. Zakona.

Slijedom navedenog Konkurencijsko vijeće je izreklo novčanu kaznu kao u dispozitivu ovog Rješenja.

Izricanje novčane kazne u datom iznosu, Konkurencijsko vijeće je odredilo imajući u vidu činjenicu da kažnjavanje podnosioca Prijave, koji nije u Zakonom predviđenom roku podnio Prijavu, nije prvenstven cilj već da izrečena novčana kazna ima za cilj obvezu provođenja Zakona i predstavlja mjeru upozorenja podnosiocu Prijave. Pored toga, Konkurencijsko vijeće je imalo i u vidu činjenicu da podnosioc Prijave djeluje u zemlji u kojoj je razvijena

konkurencijska praksa i gdje se primjenjuju identične sankcije za ovakva kršenja pravila konkurencije.

Administrativna taksa

Na ovo Rješenje podnosioc Prijave, u skladu sa članom 2. tarifni br. 107. stav (1) pod d) 1) Odluke o administrativnim taksama u vezi procesnih radnji pred Konkurencijskim vijećem ("Službeni glasnik BiH", broj 30/06), je obavezan platiti administrativnu taksu u iznosu od 2.500,00 KM u korist proračuna institucija Bosne i Hercegovine.

Pouka o pravnom lijeku

Ovo Rješenje je konačno i protiv njega nije dopuštena žalba. Nezadovoljna stranka može pokrenuti upravni spor pred Sudom BiH u roku od 30 (trideset) dana od dana prijema ovog Rješenja, odnosno od dana njegovog objavljivanja u "Službenom glasniku BiH".

Predsjednik

Gordan Raspudić, s.r.